



REPUBLIKA E SHQIPËRISË
KOMISIONERI PËR TË DREJTEN E INFORMIMIT DHE MBROJTJEN E TË
DHËNAVE PERSONALE

Nr. 575 / Prot
6

Tiranë, më 29/6 /2015

V E N D I M

Nr. 28 , datë 29/6 /2015

Në mbështetje të neneve 29, 30 dhe 32 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar, ligjit nr. 8485, datë 12/05/1999 "Kodi i Procedurave Administrative të Republikës së Shqipërisë", të procesverbalit të hetimit administrativ dhe provave të administruara në ngarkim të kontrolluesit "EUROVOICE" sh.p.k.,

V Ë R E J S E:

Në zbatim të Urdhrit nr. 142, datë 09/06/2015 është kryer hetim administrativ pranë subjektit kontrollues "EUROVOICE" sh.p.k, me objekt: Plotësimi i detyrimit për të njoftuar në zbatim të nenit 21, të ligjit nr.9887, datë 10/03/2008, "Për Mbrojtjen e të Dhënave Personale", i ndryshuar.

Kontrolluesi, gjatë ushtrimit të aktivitetit mbledh, përpunon, ruan të dhëna personale për subjektet e të dhënave të cilët kanë lidhje me aktivitetin e tij. Nga hetimi administrativ i ushtruar pranë kontrolluesit dhe provat e administruara rezultoi se "Eurovoice" sh.p.k nuk e ka përmbushur detyrimin ligjor për të njoftuar pranë Zyrës së Komisionerit (neni 21). Për shkeljen e konstatuar është mbajtur procesverbali i konstatimit në momentin e ushtrimit të kontrollit administrativ. Mbas shkeljes së konstatuar nga grupi hetimit administrativ, përfaqësuesi i kontrolluesit "Eurovoice" sh.p.k. ka paraqitur në procesverbal pretendimin se: "nuk ka patur dijeni për këtë detyrim ligjor".

Në respektim të së drejtës për t'u dëgjuar si dhe në zbatim të neneve 93-96 të ligjit nr. 8485, datë 12/05/1999 "Kodi i Procedurave Administrative të Republikës së Shqipërisë", në datë 29/06/2015 është organizuar seanca dëgjimore me përfaqësuesit e kontrolluesit lidhur me konstatimet e grupit të kontrollit administrativ, përpara marrjes së vendimit përfundimtar.

Kontrolluesi "Eurovoice" sh.p.k është informuar për datën dhe orën e seancës dëgjimore nëpërmjet shkresës nr. 575/4 prot. dt. 18/06/2015.

Kontrolluesi "Eurovoice" sh.p.k nuk është paraqitur në datën e përcaktuar dhe njoftuar për seancën dëgjimore.

Ligji Nr. 9887, datë 10.03.2008, "Për Mbrojtjen e të Dhënave Personale" i ndryshuar, është miratuar dhe botuar në Fletoren Zyrtare, me kalimin e afatit ligjor përkatës, është bërë i njohur për të gjithë publikun dhe është i detyrueshëm për zbatim. Nga miratimi i këtij ligji deri në momentin e ushtrimit të këtij hetimi administrativ ka kaluar një kohë relativisht e gjatë dhe kontrolluesi ka patur gjithë mundësinë për t'u njohur me ligjin dhe detyrimet e tij, për më tepër që ka lidhje të drejtpërdrejta me aktivitetin e tij.

Subjekti kontrollues "Eurovoice" sh.p.k sipas ekstraktit të Qendrës Kombëtare të Regjistrimit është krijuar dhe ushtron aktivitetin e tij që prej datës 24.09.2013, mosnjohja e ligjit nuk përbën shkak ligjor për përjashtimin nga përgjegjësia e përbushjes së detyrimeve të tij.

Sipas Ligjit nr.9887, datë 10/03/2008, "Për Mbrojtjen e të Dhënave Personale" i ndryshuar, kontrolluesit kanë përgjegjësinë për përpunimin e të dhënave personale të subjekteve të të dhënave, e për pasojë, detyrimin e zbatimit e të gjitha kërkesave të këtij ligji, në mënyrë të veçantë, atë të detyrimit që parashikon neni 21 i tij. Në paragrafin 1 të nenit 21 të ligjit të sipërcituar, parashikohet: "...Çdo kontrollues duhet të njoftojë komisionerin për përpunimin e të dhënave personale, për të cilat është përgjegjës. Njoftimi duhet të bëhet para se kontrolluesi të përpunojë të dhënat për herë të parë ose kur kërkohet ndryshimi i gjendjes së njoftimit të përpunimit, sipas nenit 22 të këtij ligj".

Gjithashtu, bazuar në nenin 25/1 të ligjit, kontrolluesi nuk mund të fillojë përpunimin e të dhënave personale pa njoftuar më parë Zyrën e Komisionerit. Në këto kushte, konsiderohet shkelje serioze përpunimi i të dhënave personale, pa njoftuar dhe pa u regjistruar më parë, në Regjistrin Qëndror të subjekteve kontrolluese, të administruar nga Zyra e Komisionerit. Fakti që, bërja publike e njoftimit, bazuar në nenin 26/2 të ligjit, është penguar për shkak të mosnjoftimit të përpunimit/ve që kontrolluesit realizojnë, mund të ketë penguar referencat e mundshme, që subjektet specifike të cilëve iu përpunohen të dhënat, mund të kishin bërë te gjendja e përpunimit/ve që realizohet.

Si përfundim, shkelja e konstatuar gjatë ushtrimit të kontrollit administrativ në kuptim të nenit 39/1 shkronja "d" të ligjit nr. 9887 datë 10/03/2008 "Për Mbrojtjen e të Dhënave Personale" i ndryshuar, përbën "kundërvajtje administrative" dhe sanksionohet me gjobë, si më poshtë:

- Kontrolluesit, që nuk përbushin detyrimin për të njoftuar, sipas përcaktimit në nenin 21 të këtij ligji, dënohen me gjobë në vlerën 10 000 deri në 500 000 lekë;

Kontrolluesi është person juridik dhe bazuar në nenin 39 /2 dënohet me dyfishin e gjobës për shkeljen e konstatuar.

Për zgjedhjen e masës së gjobës, Zyra e Komisionerit ka parasysh faktin se shkelja e konstatuar është serioze, ajo lidhet me të drejtën e subjekteve të të dhënave personale për t'u informuar se kush përpunon të dhëna personale, informimin si një e drejtë parësore në zbatim të ligjit dhe parim bazë i mbrojtjes së të dhënave personale. Gjithashtu, bazohet në seriozitetin dhe bashkëpunimin gjatë ushtrimit të hetimit administrativ si edhe reagimin e kontrolluesit për rikuperimin e shkeljes së konstatuar.

PËR KËTO ARSYE:

Në zbatim të neneve 21, 30, 31, 32/1, 39/1/d, 39/2, 40 dhe 41 të Ligjit nr. 9887, datë 10/03/2008 "Për Mbrojtjen e të Dhënave Personale" i ndryshuar,

V E N D O S A:

1. Dënimin e kontrolluesit "Eurovoice" sh.p.k me gjobë në vlerën 150.000 (njëqindpesëdhjetë mijë) lekë.
2. Plotësimin e detyrimit për njoftim pranë Zyrës së Komisionerit brenda 5 (pesë) ditëve nga data e njoftimit të këtij vendimi.
3. Kundër këtij vendimi mund të bëhet ankim në gjykatën administrative kompetente, në afatet dhe sipas procedurave që rregullojnë gjykimin administrativ, në përputhje me nenin 40 të ligjit nr. 9887, datë 10.03.2008 "Për Mbrojtjen e të Dhënave Personale" i ndryshuar.

Ky vendim u shpall sot në 29/6/2015

